



Senin, 6 Pebruari 2023

**Ogen: Hosea 7:1-2**



*Inget Dibata Nge Dosanta*



**L**abo tertutupi mata Dibata alu durung, tangkas kal nge man bana kerina lagu langkah ras perbahanennta. Labo lit si terligen i bas mata Tuhan. Bagi pengakun Daud, bicara nangkih aku ku deleng, i je kepe inganNdu, erkeneng pe aku iteruh lawit si mbagesna, Kam pe i je, cebuni pe aku iteru karang ingan tunduh, Kam pe enggo i je. I ja kita ras kai si iukuri bage pe kai si ilakoken kita kerina tangkas man Tuhan. Sabap Tuhan e i japa pe. Matana ku bas kerina penjuru. Perbahanen si mehuli entah si jahat e kerina la tersilahi i bas ia nari.

Man nabi Hosea pe tersinget Tuhan, kerna kejahatanen ras dosa si ilakoken bangsaNa. Si tipu-tipun ia sapi-sapih ia, ibongkarna rumah kalak, nangko ia, irampokna kalak i bas pasar-pasar. La inget bangsa enda maka kerina perbahanenna tangkas man Tuhan. Em adi biak dosa, nagih. Enggo cinanamen nggeluh entabeh, dungan teriket dosa, lanai tersilahina. Kegeluhen bangsa Israel e bagi ercurmin i bas kaca pecah-peca. Andiko....keri kal cedana. Situhuna sura-sura Dibata empepalem pusuh bangsa Israel. Tapi, tupung isampatina atenNa, mis ka teridah kesalahen si ibahaanna. Tuhu-tuhu meluat geluh bangsa e.

Pelajaren si idatken kita arah renungen enda, e me uga Dibata e lalap nikapken pusuhNa guna ngalemi bangsaNa. Amin bangsana meluat ibahan dosa lalap denga nge ateNa ialemina. Saja lenga isehken Dibata kekelengenna man bangsa erkiteken tupung atena ialemina mis ka teridah dosa-dosa si deban si enggo ilakukenna. Dosa e enggo engkeleweti bangsa Israel, menam lanai terpulahina bana arah perbahanen dosa e nari. Dosa e enggo engkuasai geluhna, lanai ia beluh milahsa apai si mehuli, apai si la mehuli. Tuhu adi gegehta labo kita ngasup pulah i bas dosa e nari. Tapi Tuhan e setia kap, sehkenNa nge keleng ateNa man si ngakuken kesalahen dengen jera.